

*Lettre au Duc de Guise, par le Mar-
quis de Brandebourg le 28.*

Novembre 1615.

Monsieur, Je croyois que vous m'eussiez
ouvert vostre cœur en nostre entreueuë,
lors du voyage de sa Majesté tres-Chrestienne
à Mets, & que vous eussiez pris la resolution
que l'honneur & la bien-seance sembloient
vous ordōner selon la part que vostre courage
prenoit au ressentiment des iniures que le Duc
Despernon a, ou occasioné, ou procuré aux
vostres. Mais j'ay a mon regret recogneu que
toutes choses ont leur alternative, & que le
temps change les meurs & les humeurs. La cō-
sideration de l'alliance en laquelle vous avez
entré ya (peut-estre) puissamment trauaillé :
attendu le rang que ceste Princesse a tenu, par
l'honneur d'auoir esté mariee en la maison de
Bourbon. Sa personne d'autre costé y aura eu
sa recommandation. Mais d'auoir oublié les
vostres & ce que vous deuez aux auteurs de
vostre naissance, pour entrer en estroite ami-
tié avec le Duc Despernon : ien'eusse creu cela
de vous. Je scay qu'il a l'honneur de tenir le de-
gré d'oncle sur madame de Guise vostre fem-
me : Cela pourrant ne vous le pouuoit tant re-
commander. Son alliance est si affamee. Sa per-
sonne si mesprisee : son nom si abhorré en la
Chrestienté, que le cœur grossit aux gens de

Case

F

39

326

1615jo

bien quil'entendent nommer seulement. Vous vous souuiendrez que remarquant la grande Clemence de ce grand Roy enuers ce Mauuais françois Patriot. Vous me dites que vous n'esperiez qu'il peut iamais eschapper la iustice Diuine, laquelle en fin porteroit le Roy a le faire punir de tant d'attentats & d'outrecuidances. Quoy? Monsieur vous auez entré en ligue avec luy, contre les Princes du sang, les autres Princes & officiers de la Couronne, associez en la poursuite de la iustice sur le funeste Parricide, duquell le Duc Despernon est atteint. I'ose dire que vous auez tort d'auoir entré en ceste lasche caballe, au preiudice de ce que vous devez à la memoire de ce grand Roy. Il estoit bon de suivre & seruir son successeur, mais avec la consideration de la fidelité qui est deüe d'un Parent, d'un Officier, d'un sujet. Sa personne circonuenue a donné des pretextes qui pallient les entreprises & les monopoles : vous y trempez.

Prenez garde ie vo^s prie aux procedures feintes, elles ne produiront rien de bon : le progrès qui a suyui ces mal'heureux commencements fait apprehender aux clairs-voyans vne fin peu heureuse a ceux qui s'y sont introduits abusiuement a gents & ministres.

Souuenez-vous de vos deuanciers, Cōment & quels ils sont nez. Vostre bisayeul par la faueur du sieur de la Tremoille fut par degrez esleué, & en charges, & en fortune de ces biens-faits : Il estoit cadet d'une maison estrangere : Il luy procura & l'alliance & le bien. Son fils vostre ayeul fut accreu sous Henry second : Con-

tinué aux charges: Mais il anticipa ; il entra trop avant à la contrequarre des Princes. L'empire en eut vn grand estonnement : Les maisōs des Illustres, Electeurs & des autres potentats d'Allemagne en furent alterees par les diuissōs qui furent caulees en ces tumultuaires actions. Vostre pere a passé outre, iusques aux attentats les biens-faits des Roys luy auoyent grossi le cœur, transporté la pensee iusques aux plus haut ainues nees de l'ambition.

Tout cela n'a rien produit qu'une desolee cheute. Iamais le vassal ne se pourra mettre a l'alabri du courroux de son Seigneur. Le Ciel a feelé les determinations infallibles à la conseruation des grandes Monarchies. Il souffre par fois des atteintes de menaces, mais il n'exécute pas par l'indifference des hommes, Vos deuançiers auoyent esté humainement receus par les Roys de France, qui d'estrangers les auoyent comme adoptez & incorporez aux qualitez & rangs des plus illustres maisons du Royaume. Il falloit mettre l'arrest a ceste promotion : l'ōbre ne doit eschapper au corps. Il falloit contenir le deuoir en la recognoissance du bien-facteur, L'ingratitude est le vice le plus indigne des grands courages. Considerez vous (en Claude de Lorraine) il n'emporta iamais huit mille liures de rente en France. Vous & les vostres qui ont esté admis aux alliances Françoises possédez pres d'un milliō de reuenu, vous egaliez vostre aîné: Mais prenez garde de vous emanciper.

Mon voyage en France m'a fait cognoistre

tout ceci, & l'histoire m'a représenté d'estran-
 ges & monstrueux acheminements aux boule-
 uers. Iugez avec moy du mouuement
 des armes de feu mōsieur de Guyse vostre pere:
 il estoit Prince bien né, de courage hautain,
 d'esprit vif mais trop presomptueux pour sa
 naissance: il arma les peuples, il souleua les
 villes contre son bien-facteur: son pretexte
 plausible aux peuples, fut tiré des memoires
 contre le Duc Despernon: l'on surpren Paris,
 le Roy en est chassé. Voyez l'issue mal'heu-
 reuse: Qui la occasionné, qui la suscitée, qui la
 poursuiui? Celuy la qui triomphe de vostre rui-
 ne, & vous triomphez avec luy sur la cheute des
 vostres: Ceux contre lesquels vous leuez l'espee
 en sa faueur sont enfans de la maison. L'inté-
 rest public ne se separe iamais de leur interest:
 le Roy surpris & entre saisi leur est recomman-
 dable: Ils sont personnes Capables de parler.
 Nature les releue du plus haut degré aupres du
 Roy: la raison parle avec eux, la iustice les au-
 doroise: la Noblesse qui a desarmé les vostres est
 en armes avec eux: ne vous faites pas hayr &
 mesprisé. Ce sont ceux mesmes & les enfans
 de ceux qui ont secondé ce Grand Roy en ses
 expéditions: leur generosité ne se laisse gour-
 mander: Prenez-y bien garde, & aux alliances
 des Princes, desquelles le feu Roy auoit appuyé
 l'establissement de sa puissance: vous les auez
 tenu & creu de mille considerations. Le Roy
 tres-Chrestien nous est en grand poids, mais
 nous luy sommes recomendables par les frater-
 nitez & amitez entretenues entre les estats des

puissants Princes d'Allemaigne, & la Couronne de France.

L'on nous a mal mis par le mescontentement qu'en ont receu nos Ambassadeurs, vous n'estes pas deschargé du soupçon d'y auoir industrieusement & a couuert mis la main. En cela l'on vous blasme de mesgarde, & d'auoir mal mis en pratique, & vostre prudence & vostre fidelité, tant enuers la Couronne de France ceste cy, que l'autre enuers la maison de vostre Aîné: Qui long-temps a, eut esté menacé & attaquée d'une furieuse végeance pour le brullement du Conté de Montbelliard : l'entretien de nostre Couronne alliance seul pouuoit appaiser ce malalent, & faire le Hola : Maintenant tout est en larme par le desdain & le mespris : Et encores plus en vostre personne, l'on poincte les reproches que vous ayez voulu renouueller les premiers débats, r'allumer les premiers feux que ce Grand auoit esteints avec vne peine sans relasche: L'on s'irrite d'autât plus contre vostre allié, de ce qu'il a esté si temeraire d'auoir attéte à la souueraineté de Mers, & au reestablisement d'un titre Royal del'Austrasie: Queile estoffe pour releuer vne Couronne? L'on murmure & l'on remue tout pour luy en oster la disposition. Qui ne peut s'assurer aux François cessant l'intelligence, qui a entretenu les deux plus puissantes Nations de l'Europe en paix & fraternité: Et que cet homme la surhaussé monstrueusement par nostre tolerence, s'asseurast sur le tombeau du plus grand Roy que la France ait eu depuis plusieurs centaines d'annees?

Non, cela ne se peut : nous auons eu quelque respect, qui cessera.

Or vous Monsieur qui me priates de me resouuenir de ceste resolution que disiez auoir : comment l'avez-vous changee ? Je vous crois Prince de courage, comment pouuez-vous souffrir la communication d'un tel homme : ie vous y crois seulement a dessein & attendant l'occasion a propos arresté en ceste Cabale. Mais regardéz les inconueniens par ceste feinte : vous irritez les Princes, les illustres familles du Royaume, les officiers de la Couronne : les exemples receus & a vos despens, vous doiuent seruir d'instruction : Certes vous n'avez rien plus recommandable que la mediocrité : elle vous conseruera, faisant esuanouyr les ialousies.

L'on nous a dit par deça que vous auez pris la presseance au Duc de Vendosme : cela vous acquiert des ennemis, & ceux la mesmement qui ont aymé le feu Roy : ils en ayment l'image & en pleignent le Rabais : ils sçauent tous que les armes des vostres ont esté opiniastrées en France par les fureurs Ciuiles, & partant ruyneuses, & la consequence par ceste desolation a incité la haine contre vostre maison, qui s'est auancee par la ruyne cōmune. Ne vous flatez pas par les enetatiens des Complaisants : ces gens là ne sont en consideration que pour leur interest : le vostre n'est pas en butte a leur escorniffleries : & outre ces premiers inconueniens, les seconds s'en ensuiuent, par les desordres que vous faites couler aux affaires trop sensible.

ment. Vous establiez la corruption a pris de pensions, d'offices, de benefices: Vous courez à tout par brigues, pour dementeler la creance des Princes, & sapper l'autorité des Parlemets. Il a esté rapporté par deça que vous auiez gourmandé les deputez du Parlement de Paris, au lieu de procurer vne libre audience: Que vous auiez offert vostre espee: vous auez eu tort de vous emanciper si auant: vostre espee eut esté de plomb aupres d'un Roy majeur, nō surpris, non circonuenu. Il y en a qui blasment le respect que l'on rendit au Roy pource qu'il empescha la main mise & vostre ruyne, sans ce respect là vous estiez perdu.

Il n'y a que cent ans que les vostres sont establis en France, par vn commencement assez foible: Claude vostre bisayeul fut par gratification du Sieur de la Trimouille fait Lieutenant de sa compagnie d'hommes d'armes.

Quelle entreprise en la troisieme lignee, les Princes du sang attaquez, les legitimes de France reculez, les desordres maintenus, les Parricides publics protegez, les finances prodiguees, l'autorité des Parlements aneantie, les premieres charges enleuees, prenez garde quelles ne vous enleuent ce que vous croyez à vous qui n'est à vous que ou par bien fait ou par tolerance: le cheual de Scian fut funeste à ceux qui en eurent la possession, Ces charges puissantes, briguees avec tant d'ambition ont esté funestes aux vostres, l'on prenoit encores pis sur vous, en esgard a vos procedures, vous vous y estes pourueu par tromperie, a ce quel'on dit

ayant volontairement offert vostre service au premier Prince du sang, s'il vouloit entreprendre, & la vengeance de la mort du Roy, & la reformation de l'Estat, des abus qui ont esté commis en l'accroissement de la fortune de Conchine qui vous mettoit en alarme & vous estoit suspecte, & vous tout à coup ayant reconnu ce Prince porté au bien, vous luy auez tourné les talons, & auez fait ligue entre Conchine & le Duc d'Espèrnon, ayant donné à la Royne Marie aduis de vostre premier traité, Cela est bien de ridicule foy. Que vous ayez surpris l'aureille & l'opinion, pour entreprendre sur les resolutions qui s'en seroyent ensuiuies, pour le restablissement des affaires, & de la maintenue du Roy en son autorité, rauallée par l'insolence du Duc d'Espèrnon, releué de la faneur que Conchine a auprès de la Royne Marie mere du Roy. Ceste offence est irreparable. L'on vous mescroit encôres que le stratageme de vostre ligue ait esté practiqué par vn homme de vile condition, sans esprit, sans sentiment d'aucune estincelle d'honneur, sans aucune rencontre pour l'entregent de la société, homme de mespris de nulle consideration, si non pour l'intendence d'vn bastiment quel'on a commencé, d'vne maison remarquable par la ruyne d'vn grand Estat. Cet homme l'a n'est recommandé que par l'affection de Conchine, & pour auoir moyenné le Triumvirat de vostre ligue, d'entre-vous, le Duc d'Espèrnon, & ledit Conchine.

Voilà les aduantageuses ratiocinations qui
vous

vous ont mis hors de vostre rang, pour courir à tous ces desordres. Qu'il a esté necessaire de signaler par la violence, de laquelle on s'est seruy contre le Chancelier pour l'intimider & luy faire relascher ces resolutions de ce rendre arbitre Ciuil des passions, mediateur d'une bõne intelligẽce & prouidẽce d'une paix bien assuree, comme il auoit commencẽ l'annẽe passẽe: car l'on vous impute la cause de son estõnemẽt, & du depart de sa premiere entremise: Auquel si l'on eut laissẽ la libre disposition en la fõction de sa charge vostre Cabale donnoit du nez a terre, & la Frãce eut retenu son authoritẽ sous l'administration legitime: qui a esté commise aux personnes viles & meschanique. Je vous parle aussi librement en ces termes d'adujs, que vous auez eu de libertẽ en vos protestatiõs. Si vous auez attendu quelque aduantageuse recompense de la maison d'Espagne, pour vous estre fourni en ses menees. Je preuoy que vous estes deceu de vostre attente. Croyez que l'on a desia iettẽ l'œil à la substitution de nouueaux afidez apres vous auoir supplantẽ.

Vos actions inesgales, ou en la paix ou en la guerre produites par la soudaine reuolution de vos esprits inquietez, luy font mescroire de vos fidelitez: Car que peũt l'Espagne en vostre endroit, que ne l'ayez receu des biens-faits des Roys de France: iettez les yeux sur les recognoissances faites à Don Alonso de Vergas apres l'en uahissement de la libertẽ des Aragonnois: Il auoit soixante & quinze ans, & tenoit le lit pour la maladie qu'il l'enleua dans quinze

iours apres, lors qu'il receut le present de la Grand maistrise de Calatrane. Il fait du bien aux morts, & ruyne les viuants. Mais il sçaura bien remarquer en vous vn deuoir mal accompli enuers vn Roy mineur. S'il vous laisse quelque autorité dans les affaires, croyez que ce sera pour vous attraper en la vanité des obiets qu'il vous fournira, & pour vous perdre aux premieres occasions, vous l'avez practiqué par vostre confusion, les pieges ne surprennent pas deux fois les oyseaux, les animaux irraisonnables. Et vous aurez de vous mesmes en vostre maison tant d'exemples sans instruction.

Beau leurre que l'ambition vous y administre, mais elle vous attrapera, ie dis avec mon grand regret, d'autant plus que vous semblez estre lié en la complicité des coniurations pour auoir depuis entré en leurs Cabales. Ie vous en crois innocent: vous m'avez aussi protesté que vous n'imputeriez iamais au feu Roy aucun moyen illegitime en toutes ses procédures: l'en crois ainsi de vous, & que vous n'eussiez voulu adherer en aucune façon aux funestes menees du Duc Despernon, Conchine & autres, qui seront manifestees à la fin pour le bien de la Chrestienté.

Ils ont pris le pretexte d'un mariage, ayant creu irriter les mescontentemens des ordres du Royaume, pour ce qu'il a esté opiniastré contre l'intention du feu Roy, contre l'honneur de la Couronne de France, pour la tolerance au rabais de ses titres, & pretensions des droits usurpez par l'Espagnol: Ceux-cy se mettent

à couuert dans ce nouveau desordre, esperent eluder la iustice, & donnant le change, se sauuer dans l'estonnement, ou se perdre dans la Ruïne publique. Mais ie ne sçay point de causes n'y de pretexte à vostre affirmatiue, qu'en l'infirmitie des resolutions des Estats, des remonstrances des Parlemens, des supplications des Princes: Tous traitez avec vne telle indignité que les Tyrannies de l'antiquité retireront leur exemples à ceux qui vous suivront: Entre lesquels vostre nom sera, non seulement mescreu, mais odieux & tourné en risée.

Cependant si le temps plus adouci ne change les occasions, ie preuoy que nos intelligences seront alienees, & que désormais nous ne nous entreparlerons point que l'espee à la main. Dieu iuste vengeur estendra ses misericordes sur ceux qui font misericorde, & fera sentir ses iugemens à ceux qui s'opiniastrent à l'endurcissement, pour en esprouuer la rigueur.

L'attends passionnément de vos nouuelles, auant que la fureur s'arise, & que les pitoyables effets de l'indignation s'entendent d'auantage sur les plus puissants Estats de la Chrestienté: Dieu preserue l'Empire & les Princes du sentiment de ceste violence, de laquelle pourtant il semble que nous soyons tous menacez. Faites moy part de ce qui se passera de nouveau qui importera à l'vniuersel.

